

Morning Dogri (NSD) National News Bulletin 27-07-2024

आकाशवाणी

खबरां नाट्यपाल सिंह कोला ।

1. प्रधानमंत्री नरेन्द्र मोदी होर अज्ज नीति आयोग दी गवर्निंग काउंसल दी 9मीं बैठक दी अध्यक्षता करगंन ।
2. राष्ट्रपति भवन बक्ख-बक्ख मौके पर राष्ट्रपति ते साबका राष्ट्रपतिं गी थ्होए दे तौहफें चां किश चुने गोदे तौहफें दी ऑनलाइन पोर्टल ई-उपहार राएं निलामी करोग ।
3. भारत दा विदेशी मुद्रा भंडार सदा कोला बद्ध 670.86 बिलियन डॉलरें तोड़ी पुज्जी गेआ ऐ ।
4. भारत ते अमरीका नै भारत थमां चुराए गोदे शिल्पे ते मूर्तिं गी वापस परताने लेई इक सांस्कृतिक संपत्ति समझौते पर दस्तखत कीते न ।
5. 2024 पैरिस ओलंपिक खेड्डां सीन नदी दे किनारे होए दे रंगारंग कार्यक्रम दे कन्नै शुरू ।
6. क्रिकेट च भारत ते श्रीलंका बश्कार होने आली त्रुं टी-20 अंतराष्ट्रीय मैचें दी श्रृंखला दा पैहला मैच अज्ज संजा खेड्डेआ जाग ।

<><><><><><>

PM-Niti Aayog

प्रधानमंत्री नरेन्द्र मोदी होर अज्ज नमीं दिल्ली राष्ट्रपति भवन सांस्कृतिक केन्द्र, च नीति आयोग दी गवर्नरिंग काउंसल दी 9मीं बैठक दी अध्यक्षता करगंन । इस ब'रे दी बैठक दा विषयसार "विकसित भारत @ 2047 ऐ । इस बैठक च भारत गी 2047 तोड़ी विकसित भारत बनाने बारे दृष्टिकोण बारे चर्चा कीती जाग । नीति आयोग नै आखेआ जे गवर्नरिंग काउंसलिंग दी बैठक च शैहरी ते ग्रामीण इलाकें च रवा'रदे लोकें दे जीवन गी होर बेहतर बनाने बारे केन्द्र ते राज्य सरकारें बश्कार तालमेल ते आयोग बारे चर्चा कीती जाग ।

<><><><><><>

President

राष्ट्रपति भवन बक्ख-बक्ख मौके पर राष्ट्रपति ते साबका राष्ट्रपतिएं गी थ्होए दे तौहफें चां किश चुने गेदे तौहफें दी ऑनलाइन पोर्टल ई-उपहार राएं निलामी करोग। इस पोर्टल दी शुरूआत राष्ट्रपति द्रौपदी मुर्मू होरें अपने कार्यकाल दे दऊं ब'रें पूरे होने पर कीती ही। निलामी दे पैहले गेड़ च ढाई सौ तौहफें निलामी लेई रक्खे जांगन। जेहदे लेई बोली 5 अगस्त थमां 26 अगस्त तोड़ी खुल्ली रौहग। बोली दा समें समाप्त होने पर मुत्तलका समेयान गी सारे शा बद्ध बोली लाने आले तोड़ी पजाई दित्ता जाग। निलामी च रूचि रखने आले लोक ऑनलाइन पोर्टल e-uphaar.rashtrapatibhavan.gov.in राएं बोली च हिस्सा लेई सकदे न।

<><><><><><>

Foreign Exchange

भारत दा विदेशी मुद्रा भंडार सदा कोला बद्ध 670.86 बिलियन डॉलरें तोड़ी पुज्जी गेआ ऐ। भारतीय रिजर्व बैंक आस्सेआ जारी आंकड़े मूजब इस हफते मुद्रा भंडार च 4 बिलियन डॉलरें दा बाद्धा दर्ज कीता गेआ। भारत दा मजूदा एकाउंट डैफीशेट बी घटियै 23.2 बिलियन डॉलरें तोड़ी पुज्जी गेआ ऐ।

<><><><><><>

APJ Kalam

अज्ज राष्ट्र साबका राष्ट्रपति ते मन्ने परमन्ने दे सांईसदान ए.पी.जे.अब्दुल कलाम होरें गी उंदी 9मीं पुन्यतिथि पर भावें भरोची श्रद्धांजलि देआ करदा ऐ। उनें भारत च अंतरिक्ष ते मिसाईल विकास कार्यक्रम च महत्वपूर्ण भूमका नभाई ही। उनें मिसाईल मैन ऑफ इंडिया दे नां कन्नै बी जानेआ जंदा ऐ। उंदा देहांत अज्जै दे दिन यानि 27 जुलाई 2015 च होआ हा।

<><><><><><>

India-America

भारत ते अमरीका नै भारत थमां चुराए गेदे शिल्पे ते मूर्तिएं गी वापस परताने लेई इक सांस्कृतिक संपत्ति समझौते पर दस्तखत कीते न। इस समझौते तैह्त दौनें मुख परातत्व सामग्री दे गैर कनूनी आयात-निर्यात ते तस्करी गी रोकने लेई मिलियै कम्म करगंन। इत्त सरबंधै च अमरीका कन्नै एह पैहला-पैहला समझौता ऐ। नमीं दिलली च पत्रकारें गी संबोधत करदे होई संस्कृति ते सैलसफा मैहकमे दे मंत्री गजेन्द्र सिंह शेखावत होरें आखेआ जे इस समझौते कन्नै दौनें मुखें बशकार सांझ-भ्याली होर मजबूत होग। तोआई भारत च अमरीका दे राजदूत एरिक ग्रेसेटी होरें आखेआ जे एह समझौता भारत गी ओहूदा हक्क दोआने लेई पुट्टी गेदी महत्वे आली गैह ऐ।

<><><><><><>

My Gov.

माई गाँव मंच दे 10 ब'रे पूरे होई जाने उप्पर प्रधानमंत्री नरेन्द्र मोदी होरें इस प्लैटफार्म लेई कम्म करने आले ते इसगी विकसित करने आले दी सराहना करदे होई आभार व्यक्त कीता ऐ ते अपने बचार सांझे कीते न। इस सोशल मीडिया पोस्ट च श्री मोदी होरें आखेआ जे पिछले इक दहाके थमां माई गाँव प्लैटफार्म खरे शासन ते लोकें दी समूहलियत आला शानदार मंच उभरियै सामने आया ऐ।

<><><><><><>

IMD

भारतीय मौसम मैहकमे नै इस हफते लेई मुंबई च बड़ी मती बरखा पोने सरबंधी यैलो अलर्ट आली चेतावनी जारी कीती ऐ। मुंबई च इसलै बड़ी भारी बरखा पवा'रदी ऐ। मुंबई दे इलावा पालघर ते रायगढ़ लेई बी यैलो अलर्ट ते ठाणे ते रत्नागिरि लेई ओरेंज अलर्ट आली चेतावनी जारी कीती गेई ऐ।

<><><><><><>

Amarnath Yatra

श्री अमरनाथ जी दी सालाना यात्रा दे 28में दिन यानि कल देश दे बक्ख-बक्ख हिस्से थमां आए दे श्रद्धालुएं पवित्र गुफा च मत्था टेकेआ, जिंदी गिनतरी 8 जहार 781 ही। अज्ज बडलै

जम्मू दे भगवती नगर आले आधार शिविर थमां नुनवन-पहलगाम ते बालटाल-गांदरबल दौनें बेस कैपें बक्खी यात्रुएं दा काफला रवाना होआ। 63 गड्डिएं च सुआर यात्रु कड़ी सुरक्षा बंदोबस्त हेठ यात्रा लेई अगगे बधे। अज्ज दे जत्थे च 1 ज्हार 269 मर्द, 398 महिलां, 1 न्याणा, 95 साधु ते 10 साध्वियां शामिल हियां। 29 जून गी शुरू होई दी इस पवित्र यात्रा दे चलदे हुनै तोड़ी 4 लख 44 ज्हार 340 श्रद्धालुएं शिवें दे हिमलिंगम रूपै दे दर्शन करी लैते न। 52 दिनें तगर चलने आली एह यात्रा रक्खड़ पुन्नेआ गी सम्पन्न होग जिस दिन हिंदुएं दा ध्यार रक्खड़ी बी मनाया जंदा ऐ जेहड़ा इस बारी 19 अगस्त गी आया ऐ। इस्सै दिन भगवान शिव दी पवित्र छड़ी गी दशनामी अखाड़ा श्रीनगर थमां पवित्र गुफा तोड़ी महंत दिपेन्द्र गिरी ते होरने दुए साधुएं दी अगुवाई च लेता जाग।

<><><><><><>

Olympic

2024 पैरिस ओलंपिक खेड्डां सीन नदी दे कंडे होए दे रंगारंग कार्यक्रम च शुरू होई गेइयां न। बड़ी मती बरखा दे बावजूद बड़ी मती गिनतरी च लोकें इस उद्घाटनी प्रोग्राम गी दिक्खेआ। दुनिया भरै दे मुखें थमां कोई 7 ज्हार खडारिएं कल परेड ऑफ नेशन च हिस्सा लैता। भारत दी तरफा दऊं बारी ओलंपिक तगमा जित्ती चुके दी बैडमिंटन खडारन पी.वी. सिंधु ते 5 बारी ओलंपिक च हिस्सा लेइ चुके दे टेबल टेनिस खडारी शरथ कमल होरें भारतीय दल दी अगुवाई कीती। पैरिस ओलंपिक खेड्डे च भारत दे 117 खडारिएं दा दस्ता हिस्सा लै'रदा ऐ। प्रधानमंत्री नरेन्द्र मोदी होरें खडारिएं गी शुभकामनां दिंदे होई आखेआ जे मुख्यै गी हरेक खडारी उप्पर गर्व ऐ।

<><><><><><>

Cricket

क्रिकेट च भारत ते श्रीलंका बश्कार होने आली त्रऊं अंतर्राष्ट्रीय टी-20 मैचें दी श्रृंखला दा पैह्ला मैच अज्ज संजा खेड्डेआ जाग। टी-20 श्रृंखला मगरा पैहली अगस्त थमां भारत ते श्रीलंका बश्कार कोलंबो च त्रै इक दिने आले अंतर्राष्ट्रीय मैचें दी श्रृंखला खेड्डे जाग।

<><><><><><>